

## Öven un Tricks to'n Sorteern & Co.

To düsse Öven nehmt wi en Ordner, de al dor is un in den vele Datein steken daat, un dat is de Ordner C:\Windows.

**Wohrschu!** In den Ordner Windows schullt Se nienich wat ümnöömten, verschuven orr löschen! Wenn't dochen passeert is, maakt Se't foorts **Rückgängig!**

- Navigiert Se in den Ordner Windows. De **Ansicht** schull sülvstreden **Details** ween.
- Wa oolt sünd de drie öllsten Datein in düssen Ordner? (Sorteern na Datum!)
- Wa vele Datein vun den Typ Bitmap stekt in den Ordner? (Sorteern na Typ, de funnen Datein tellen!)  
(Eleganter geiht dat mit de **Suchen**-Funktion, de Se in Deel 9 kennen lehrt!)
- Sorteert Se noch wieder; denkt Se sik Kriterien ut. Se seht, Ordners hebbt de Mood, tosamantohangen. Se sorteert sik nich mit de Datein dörchenanner.
- Wa veel Datein stekt insgesamt in düssen Ordner? To düsse Öven gifft dat de Lösung nerrn. Dor lehrt Se wat Niegs dorto.

### Lösung

#### 1. De Statusliest

Toerst mal kiekt Se sik den Inhold vun den Ordner Windows in't rechte Fenster an. Nu fangt Se avers nich etwa an to tellen! Bedenkt Se, Se hebbt en **Computer**, ok dorför, dat Se nienich wedder sülvten tellen schallt!

Kiekt Se mal in de Statusliest vun'n Explorer. De sitt heel nerrn an't Fenster, as alle Statuslisten. Dorunner is bloots noch de Startknoop.



– Nix to sehn? Keen Statusliest? In't Menü **Ansicht | Statusleiste** mutt de lütt Hoken sitten.




Nu seht Se ganz links in de Statusliest de Angaav „400 Objekt(e) (und 19 versteckte)“ – bloots mit anner Tallen, denn dat is vun Windows-Installaschoon to Windows-Installaschoon ünnerscheidlich. 400 Objekte – is dat de Anter? So veel Datein un Ordner? – Nee – dat's man bloots op de bövelste Ebene! D.h. wat Se nu in't rechte Explorerfenster seht, sünd 400 Ordner un Datein. Avers wat stekt **in** de Ordner noch för Ünnerordner un Datein? Kannst dat rutkriegen? Windows kann.

#### 2. De Egenschapen

In't linke Explorerfenster seht Se ja noch den Ordner Windows as Ganzes. Rechtsklickt Se em un wählt Se ut dat Kontextmenü **Eigenschaften**.





In dat Dialogfenster, wat Se nu seht, raast Windows dör de ganzen Ünnerordner un Ünner-Ünnerordner vun den Ordner, de sin Egenschapen Se anfeddert hebbt, un tellt de Ordner un Dateien dor binn. Bi den Ordner Windows kümmt denn de respektable Tall vun poor Dusend Dateien un poor Hunnert Ordner rut – je na Installaschoon ünnerscheidlich.

So veel Ordner un Dateien stekt also insgesamt in Ehr Windows binn! Un allens dat brukt Windows to'n Funscheneern!

### Egenschapen vun Loopwarken

Bi Loopwarken (also Fastplatten) is de Kontextmenü-Befehl **Eigenschaften** to bruken, natokieken, wa veel frien Platz dat dor noch op gifft. Se kriggt denn düsse lustige blaag-rosa Grafik to sehn.

